

# Jabatan Perikanan nasihat nelayan pantai sentiasa peka

BH 28/10/2022 M.S: 22

**Kuala Lumpur:** Jabatan Perikanan menasihatkan nelayan pantai mengambil langkah berjaga-jaga dan peka terhadap laporan ramalan cuaca dikeluarkan Jabatan Meteorologi Malaysia (MetMalaysia) dari semasa ke semasa.

Ketua Pengarahnya, Datuk Mohd Sufian Sulaiman, berkata ia susulan ramalan MetMalaysia bahawa negara akan mengalami hujan lebat berterusan mulai pertengahan November ini yang membawa banjir pada penghujung bulan berkenaan.

"Justeru, saya berharap nelayan tidak mengabaikan ramalan ini bagi mengelak sebarang risiko berbahaya," katanya dalam kenyataan semalam.

Beliau turut mengingatkan penternak ikan sangkar supaya menangguhkan operasi baharu ternakan ikan ketika monsun timur laut dan mempertimbang untuk menjual ikan yang sudah mencapai saiz pasaran.

Mohd Sufian berkata, penternak juga perlu memantau pro-

jek ternakan lebih kerap bagi menyelamatkan ternakan yang masih ada, memeriksa struktur ban kolam dan mengambil serta menyimpan gambar sistem ternakan kolam atau tangki ikan sebelum, semasa dan selepas kejadian banjir.

"Sekiranya ditimpa banjir, penternak dinasihatkan membuat laporan polis dan mengemukakan laporan kepada Pejabat Perikanan berdekatan serta memakai dan menyediakan peralatan keselamatan secukupnya.

"Penternak juga dinasihatkan sentiasa peka dengan laporan ramalan dan perubahan cuaca melalui pautan

[www.met.gov.my](http://www.met.gov.my), atau menerusi aplikasi myCuaca, media sosial rasmi MetMalaysia dan talian 1-300-22-1638," katanya.

Mohd Sufian berkata, penternak akuakultur juga perlu mengikut arahan Agensi Pengurusan Bencana Negara, sekali gus mengambil langkah lain yang difikirkan perlu. **BERNAMA**



Mohd Sufian Sulaiman